

N rival donc'avi fórt e mèz malan, qu'm'orêa mórt;  
L'anèl instés odèi qu'jovèssa púc; qu'fortúna,  
Sveltéza e zënza nia vitória dës, lapró l tórt  
Odèi fagèssa, fò plù tlér segù qu'la lúna.

Mo vé, bëgn prës les sables s'incrogèia, petádes  
Adum con tan gran fórza qu'an odóva stizes  
Insciqu'an ès impiè na pila d'frósc's sichádes,  
L šešúr credóven qu'gnis da saš qu's'logès da pizes.

La squérma<sup>1)</sup> conesciô mi n'mic tan bëgn qu'iù instés; soîè  
Mesá vignùn dë tal manfra, qu'l mûs e l corp dût  
R'gorô: tan frëm nã sta n fradon<sup>2)</sup> sùn antoré apoiè  
Qu'vignùn d'nôs dòi charáva trës quë l'póst n'i fôs tât.

Alfin, qu'ël sî per aiût devin o sòl per fórza  
D'mi brace, l nemic scomència a tremoré, devènta  
Tel mûs plù blanc dë n lérege san desòt súa scórza,  
La lancia i tòma šegn d'la man e l'oedl spavènta.

Diolán digeons a Di del'aiût in quëla véra,  
Abinon l patúce adum digean „a r'vèder“<sup>3)</sup> plau plan  
Al païs salvár', dlacé e corí da gran nevéra;  
Iù tir'tel lian sù insóm, l'odòndra s'cúfa t'mia man.

Ocèl tan snèl n'a mai lascé dô d'ël con áres  
Lesíres n léc qu'l'odòndra e iù pasân con jór nù  
E mai odù denant ia súra l mér; qu'ël fôs aváres  
Dë dër bî pra parôl, tan bèl inant podòn s'my.

Fermé n's fermân in mèz al mér, olá qu'ël fóva  
Crepons<sup>4)</sup> e pizes altes plù qu'vign'áter crëp d'nant  
Odù da mé; no lëgns, no chases mi oedl n'podóva  
Traodèi; ël fóva tan salvár', qu'temú s'ès bëgn 'chi n sant.

<sup>1)</sup> scherma.    <sup>2)</sup> aumentativo di „frat“.

<sup>3)</sup> addio.    <sup>4)</sup> aument. di „crëp“.